

gegen aber nicht mehr außwerffen können/) aus der zunehmenden Schwach- und Mattigkeit gesehen/ daß der Allerhöchste GOtt mit jhme Feyerabend machen würde/ vnd von dieser Welt jhn nach seinen Väterlichen Willen abfordern/ wie er sich dann offtermahl/ auch lang zuvor vnd noch bey gesundem Leibe seiner Sterblichkeit erinnert/ in dem er jhme nicht allein für vielen Jahren den jetzt erklärten Text zur Leichpredigt benant/ vnd den Ort seiner Begräbnis selbst bestalt/ sondern auch das Stacket⁵⁹ vmb denselben vor 4. Jahren machen lassen/ vnd in seinem Hoffe/ als Nicodemus sein Grab im Garten/ zur stetswehrenden Erinnerung seines letzten Endes/ biß daher verwarlich behalten/ auch noch vor vngefahr einen halben Jahr den Herrn Obristen von dem Werder⁶⁰/ auff seinen Todt ein Teutsches Epitaphium zu machen/ gebeten. So hat er sich des Allerhöchsten gnädigen Väterlichen Willen Kindlich ergeben/ vnd demselben alles gehorsamlich anheim gestellet. In wehrender dieser Kranckheit hat er sich gar gedültig erzeiget/ Gott dem Allerhöchsten seine Sünden gebeichtet/ dieselbe mit zerknirschem und zerschlagenem Herten/ vnd heissen Zehren be-[Mij r]seufftzt/ Wie er dann in meiner gegenwart erkant vnd bekant/ daß er nicht allein allen grossen Schaden/ welchen er durch das leidige Kriegswesen vnterschiedlich erlidten/ sondern auch seine vielfaltige zuvor außgestandene/ vnd dann auch damahlige gegenwertige Kranckheit/ umb seinen GOtt sehr wol/ vnnd noch mehr als andere/ die mit dergleichen Züchtigung belegt/ verschuldet vnd verdienet habe/ Welches dann eine gewisse anzeigung/ daß er desto grössere Barmhertzigkeit von GOtt wider seine Sünde mit Paulo erlanget/ welcher bekant/ daß er vnter den Sündern der grösseste were/ vnd deswegen rühmete/ daß jhme darumb desto grössere Barmhertzigkeit widerfahren/ auff daß an jhme fürnemblich JEsus Christus erzeigete alle Gedult/ zum Exempel denen die an jhn gläuben solten zum ewigen Leben.

Weil er aber von Tag zu Tag/ je länger je schwächer worden/ also daß sich die Kräfte gantz verlohren/ habe ich jhn meiner schuldigkeit nach täglich fleissig besucht [...] jhme zugesprochen [...] [Mij v] [...]: Jeddenoch/ weil wir nicht wüsten/ wann vnser Zeit vnd Stunde zum seligen absterben vns gesetzet/ vnd Augenblicklich auch bey gesundem Leibe vns dazu gefast zu halten schuldig weren/ So zweiffelt mir nicht/ der Herr Hoffmeister/ wann es GOtt dem HERN gefallen würde vber jhn zu gebieten/ vnd aus dieser Welt abzufordern^d/ würde sich schon vorlangst darzu geschickt/ vnd es mit seinem Erlöser JEsu Christo abgeredt haben/ damit er in warhafftiger Bssue^e/ lebendigem Glauben/ beständiger vnd frölicher Hoffnung/ demselben seinen Mitler vnd Seligmacher seine Seele zu trewen Händen möchte anbefehlen: Darauff er seine Hände gefalct/ in die höhe erhoben/ mit seinem Herten geseufftzt vnd gesagt: Jch bin bereit/ vnnd habe ein verlangen bey meinem Erlöser JEsu Christo zu seyn/ aber vmb der meinigen willen möchte ich wünschen/ daß mir der liebe GOtt noch etwa auff 6. oder 8. Wochen mein Leben nur fristen wolte/ Vnter des aber geschehe/ was mir nützlich [Mij r] vnd selig ist/ Hie bin ich/ GOtt mache es mit mir/ wie es jhme gefellet. Vnd weil ich verspüret/ daß jhm viel reden nicht angenehm gewesen/ vnd hergegen gesehen/ wie er fast allezeit/ wann ich bey jhm gewesen/ ein HertzensGesprech mit GOtt gehalten/ seine Augen